

## Ho hlakolwa ha Ngodiso ya Dithraste le Boikobelo ba Lekgetho

**Tshwane, 09 Mmesa 2026** – Ditshebeletso tsa Lekgetho tsa Afrika Borwa (SARS) di hopotsa dithraste tsohle tse ngodisitsweng Afrika Borwa hore, ho latela dintlha tsa molao wa lekgetho, di lokela ho nehelana ka Dikgutliso tsa Lekgetho la Lekeno bakeng sa selemo ka seng sa hlahlobo. Boitlamo bona bo dula bo sebetsa le moo thraste e sa etseng diketsahalo tsa ikhonomi ka selemo se amehang.

Moo thraste e sa hloheng e sebedisetswa maikemisetso a yona a sethatho, batshepuwa ba kgothaletswa ho fedisa thraste e jwalo semmuso ka Ofisi ya Hlooho ya Lekgotla le Phahameng (Hlooho). Hang feela ha Hlooho e ntshitse tiisetso e ngotsweng ya phediso, batshepuwa ba lokela ho kopa SARS ho hlakola thraste eo ho tse mabapi le merero ya lekgetho la lekeno. Motjha ona o thusa ho thibela ho behwa ha dikotlo tsa taolo tse sa hlokahaleng tse bakwang ke ho se ikobele ho ntseng ho tswela pele.

Le ha Molao wa Taolo ya Thepa ya Dithraste o sa totobatse motjha wa ho hlakolwa ha ngodiso, ka 2017 Hlooho e Okametseng e ile ya ntsha taelo e fanang ka tlhakisetso mabapi le motjha o lokelang ho latelwa. **Hwa bohlokwa, batshepuwa ba tlameha hore pele ba fumane hore na maemo a boikobelo a thraste a eme jwang le ho lokisa sena le SARS pele ba ikopanya le Hlooho bakeng sa phediso.**

Batshepuwa ke baemedi ba balefalekgetho ba thraste ho latela dintlha tsa Molao wa Lekgetho la Lekeno mme ba lokela ho nnetefatsa hore dikgutliso tsohle tse morao, ditefo, mmoho le boitlamo bo amanang le lekgetho di lokile pele ba kopa phediso ho Hlooho mmoho le ho hlakolwa mane SARS. Ka dinako tse ding, ho ka nna ha etsahala hore SARS e kolota thraste pusetso. Hang feela ha thraste e se e fedisitswe ke Hlooho, ka molao ha e sa hlola e le teng, feela jwalo le Ofisi ya Botshepuwa. Boemong bo jwalo, ka molao SARS ha e kgone ho sebetsana kapa hona ho lefa dipusetso dife kapa dife tse kolotuwang thraste.

Kahoo batshepuwa ba koptjwa ho latela motjha o nepahetseng: taba ya pele ke ho tiisa le ho lokisa merero ya thraste le SARS, mme ke ka mora mona moo ba ka tswelang pele ho e fedisa ho Hlooho. Motjha ona o baballa boikobelo mme o sireletsa batshepuwa ho jara boikarabelo ka bobona. Sena se boela se nnetefatsa hore dipusetso dife kapa dife tse kolotuwang thraste di sebetswa ka nako.

Ho fumana lesedi le fetang lena, ka kopo ikopanye le [SARSMedia@sars.gov.za](mailto:SARSMedia@sars.gov.za)

KE PHETHO